

*Prome Minister Mike Eman y Minister Sevinger
a constata cu:*

Renobacion Willem de Zwijger plein ta avansando satisfactoriamente



ORANJESTAD – Trabounan di renobacion y ampliacion di Willem de Zwijger Plein ta bayendo sin ningun contratiempo y, si sigui asina, ta keda cla pa mita di aña manera a keda programa y presupuesta. Esey ta e conclusion cu Prome Minister Mike Eman y Minister di Infraestructura Benny Sevinger a saca despues di a bay na e luga mes y combersa cu tur es nan involvi. Gabinete Mike Eman II ta contento cu pronto comunidad ta bay conta cu

otro espacio publico recobra y cu ta uni na henter e embeyecemento di centro di ciudad. E mandatarionan a bishita e plaza situa dilanti di e tambe recientemente renoba edificio di Corte caminda a topa cu arkitecto, Monumentenbureau y contratista. For di nan a haya un splicacion amplio di tur aspecto di e obra manera ta diseño, construccion y landscaping, pero tambe e bolbe ubica e obelisk cu ta e figura principal di e plaza y instalacion di obra ‘Dama Husticia.’ E ultimo aki ta un pieza cu a keda otorga pa wordo realisa pa e artista Arubiano Ciro Abath. Tanto Minister President Eman como Minister Sevinger tabatin hopi pregunta, pero na final ta satisfecho di e manera con e trabounan ta canando den e proyecto aki. Ambos ta di opinion cu rehabilitacion di e espacio publico aki cu a keda lubida den tempo, ta bay aporta considerablemente na e atractivo di Oranjestad como destinacion. Mas importante ainda ta cu ta brinda e comunidad den e bisindario un luga publico bunita y agradabel caminda ciudadanonan por bin hunto y comparti. Esaki na su luga, ta fomenta cohesion social cu ta un meta di importancia halto pa Gabinete Mike Eman II. Den e diseño a percura pa matanan cu sombra y bakinan cu tin dobel funcion como banki y asina tin hopi luga pa sinta. Anochi ta haci uzo sabi di iluminacion cu ta sali for di e vloer mes pa no solamente resalta e puntonan principal di e plaza, pero tambe brindando un ambiente sigur.

E proyecto ta programa pa wordo concretisa den luna di juni proximo y no tin ningun motibo te aworaki pa pensa cu esey lo cambia. Yvonne Webb y Daphne Every di Monumenten bureau, hunto cu InfraTeam y contratista Bohama Aruba N.V. ta trahando di manera estrecho y positivo. A keda confirma, cu un bes Willem de Zwijger plein keda cla lo ofrece na un y tur un area masha acogedor tanto den dia como tambe anochi. □